

kontuola

KONTUOLA, Idolaz elkarte, ANTZUOLA. Kazetaria: Aintzane Irizar **Publizitatea:** Mireia Larrañaga **Erredakzio kontseilua:** Miren Anduaga, Gotzon Iparragirre, Patxi Kortabarria, Jone Larrañaga **Testuen zuzenketak:** Sergio Azkarate, Gari Bragado **Telefonoa:** 943 76 03 97 **Faxa:** 943 76 29 77.

Antzuolako hamabostekaria, 86. zenbakia. 2001eko urriaren 5a.

Etxe adosatua Mainittan

Petxanima sozietate mugatuak 13 etxe adosatuko ditu

Aurrera doa Petxanimaren egitasmoa. Mainitta azpialdean 13 etxebizitza adosatu egingo dituzte. Horretarako, hain zuzen ere, eratu zuten Petxanima sozietate mugatua, lurrak erosi eta euren etxebizitzak egiteko, alegia. Urte amaieran lanekin hasteko moduan egongo direla espero dute.

Duela pare bat urte, herriko lau lagun elkartu ziren ideia hori buruan zerabilgela. Lursail bat erosi eta etxebizitzak egitea, hain zuzen ere. Baina, pixkanaka-pixkanaka, jende gehiago batu zitzairen. Gaur egun, guztira, 13 bazkide dira; horrek esan nahi du 13 etxebizitza egingo dituztela.

Josu Errasti Petxanimako ordezkariak adierazi digunez, «aspalditik dator ideia hau; 1995ean ere saiatu ginen antzerako ekimen bat abian jartzen, baina hainbat arrazoi izan zirela medio, bertan behera laga behar izan genuen».

Azkenean, Mainitta azpialdeko lurrak erosteko aukera izan zuten, eta halaxe hasi zen egitasmo honen historia. Ordutik hona, harremanetan izan dira Udalarekin. Izan ere, arau subsidiario zaharrek ingurune horretan etxe-multzo handiak egitea aurrez ikusten zuten. Arauen aldaketa puntual baten bitartez, lortu zuten gune horretan 13 etxebizitza adosatu eraikitzeke erabilia izan zedila. Hortaz, nahiz eta bidean oztopotxo batzuk izan, aurrera doaz proiektuarekin.

BI ETXE MULTZOTAN

Halaxe egingo dituzte 13 etxebizitzak, bi etxe multzotan. Baten, bost etxe adosatu egingo dituzte, eta bestean, zortzi.

Sotoa, bi solairu eta teilatupekoa izango ditu etxebizitza bakoitzak. Bi so-



lairuek 140 bat metro koadro izango dituzte. Teilatupekoak erabiltzeko moduko 50 bat metro koadro izango ditu. Bestalde, etxebizitza bakoitzak, atzeko aldean, lursailtxo bat izango du, 42 metro koadrokoa, gutxi gorabehera, lorategi bat jartzeko modukoa.

URTE AMAIERAN HASTEKO MODUAN

Egin dituzten aurreikuspenen arabera, urte amaieran lanekin hasteko moduan egongo dira, eta 18 bat hilabeteetan etxe-

bizitzak bukatuta egotea espero dute. Batek baino gehiagok pentsatuko zuen, hala ere, dagoeneko hasita daudela. Izan ere, inguruak txukuntzen ibili dira azkenaldian; hango zuhaitz eta sasktrakak kendu, eta gune hori garbitu egin dute. Horren arrazoa da azterketa topografikoa eta geoteknikoa egin ibili direla.

Zalantza barik, etxebizitza lortzeko hainbat bide dauden adibidea dugu honako egitasmo hau.

■ ■ ■
Bi solairu, sotoa, teilatupekoa eta lursailtxo bat izango ditu etxebizitza adosatu bakoitzak
■ ■ ■

Astero jasoko dugu Kontuola urriaren 19tik aurrera

‘Goienkaria’ren barruan joango da, itxuraldatuta

Esku artean duzuen hau hamabostean behin jasotzen duzuen azkeneko *Kontuola* izango da. Urriaren 19an, hamabostekari izateari laga eta astekari bihurtuko da *Kontuola*; egubakoitzero jasoko duzue zuen etxeetan. Horrela, orain arte baino freskoago iritsiko zaizkizue berriak. Berba bitan esateko, aro berri bat hasiko dugu urriaren 19an, eta egun horretatik aurrera ezer ez da berdin izango Antzuolan.

Ez da nolana hiko aldaketa izango. Batetik, orain arte ez bezala, astero-astero jasoko duzuelako zuen etxeetan. Baina ez da hori izango aldaketa bakarra. Formatua bera ere dezente aldatuko da, eta, horrekin batera, baita edukiak ere. Produktu aberatsagoa lortzea izan da berritasun horien guztien helburua.

Orain arte Din A4 edo aldizkari formatuan egin izan da *Kontuola*. Hemendik aurrera, berriz, Din A3 edo egunkari formatuan egingo da, eta Bergarako *Berrigara* eta Elgetako *Goibekokale* aldizkariekin batera joango da, *Goienkariaren* barruan. Debagoien osoko albisteak jasoko ditu *Goienkariak*, orain arte moduan, eta barruan, Elgeta, Bergara eta Antzuolako albisteak jasoko dituzte beste 24 orrialdeko edizioan. Hortaz, *Goienkaria* bera ere asko aldatuko da, 24 orrialde izatetik 48 izatera pasatuko da eta.

‘KONTUOLA’ BERGARAKO EDIZIOAN

Hiru edizio izango ditu *Goienkariak*: Arrasatekoa, Aretxabaletakoa eta Bergarakoa, hain zuzen. Lehendabizikoan, Arrasate eta Aramaioko berriak jasoko dira; bigarrenean, berriz, Aretxabaleta, Esko-

riatza eta Gatzagakoak. *Kontuola*, ostera, Bergarako edizioan joango da, esan bezala. Egoitza ere hantxe izango dute hiru aldizkariak, baita *Kontuolak* ere. Hemendik aurrera ez da Antzuolako Herri Eskolan egongo, Bergarako Irizar jauregiko egoitzan baino. Hortaz, herritarrek ere haraxe jo beharko dute zer edo zer nahi izanez gero: ekitaldiren baten berri

eman, mezu, ohar, dei, eta abarren berri emateko, hain zuzen ere. Harremanetarako telefonoa 943 76 03 97 da, eta helbide elektronikoa, berriz, airizar@goiena. Helbide horren bitartez, Aintzane Irizar *Kontuolako* arduradunarekin harremanetan jarri ahal izango zarete. Aintzane Bergarako egoitzan lan egingo duen arren, gertutik jarraituko du Antzuolan gertatzen dena, eta hantxe jasoko ditu albisteak. Bergarako edizioko arduraduna, berriz, Edu Mendibil izango da.

ALBISTEAK BAINO ZERBAIT GEHIAGO

Kontuolaren zeregina ez da izango asteak eman dituen berriak ematea bakarrik; hori ere bai, jakina, baina *Kontuola* hori baino harantzago doa, eta albiste ez diren bestelako hainbat informazio eskainiko ditu: zerbitzu-informazioa, agenda, elkarrizketak, iritziak... Hortaz, asteak eman dizkigun gertakariez gain, era askotako informazioa zabaltzea izango da *Kontuolaren* zeregina. Gainera, kontuan hartu behar dugu Antzuola herri txikia dela, eta astekari baterako adina albiste ez dela gertatzen. Horregatik, eta astekari baten oinarri bakarra ez denez albisteen berri ematea, zerbitzu in-



Kontuolaren aurkezpena, 1997ko irailean.

GOROSTI
Taberna

☎ 943 76 62 96
Zurrategi plaza ANTZUOLA



Jose Gomez
Abad

Errekalde 6, 4-B. Antzuola
943 76 60 19
943 76 60 43

AITZ-GARBI



taberna
jatetxea

Pintxoak eta kazuelatxoak.
Bazkariak eta afariak

Kalebarren 15. Tf. 943 78 70 51

Marian Padilla, HHIko irakaslea

«Helduen irakasle izatea oso lan eskertua da»

Laugarren ikasturtea hasi berri du Marianek Antzuolako Helduen Heziketa Iraunkorreko irakasle moduan. Aurten, gainera, lokal berria estreinatu dute; Errekaldetik Herri Ikastetxera pasatu dira. 12 ikasle ari dira Marianekin. Gazteenak 30 urte dauzka; helduenak, berriz, 68.

Noiztik ari zara Antzuolan eskolak ematen?

Aurtengoa Antzuolan nabilen laugarren ikasturtea izango da. Hala ere, duela zazpi urte jarri genuen HHIko ikastetxea Antzuolan. Lehendabiziko hiru urteetan Gurutze ibili zen.

Ordura arte Bergarara etortzen ziren antzuolarrak. Horietako ikasle batek proposatu zuen Antzuolan ere eskola jarzea. Antzuolako Udalaren laguntzarekin, eta ikasle horren laguntzarekin, duela zazpi urte jarri genuen, esan bezala.

Zer irakasten duzue Helduen Heziketa Iraunkorrean?

Idazten eta irakurtzen irakasteko, edo horretan hobetzeko aukera eskaintzen dugu. Kultura orokorreko hainbat gai ere lantzen ditugu, geografia eta matematika, esaterako. Bestalde, orain, euroa datorkigula-eta, hori lantzen ari gara, urtarrilean prest egoteko.

Zelako jendea etortzen da zuen eskoletara?

Badaude idazten eta irakurtzen ezertxo ere ez zekitenak, eta gaur egun alfabetatuta daudenak. Beste batzuk, berriz, idazten eta irakurtzen jakin arren, hobetu nahi dutenak. Bestalde, aipatu behar da gehienak emakumeak izaten direla.

Helduen edo umeen irakaslea izatea ez da berdina izango. Zeintzuk dira



Marian Padilla, HHIko irakaslea.

helduei eskolak ematearen alde on eta txarrak?

Bada, ez, ez da berdina. Nik, gainera, biak probatu ditut. Helduekin lan egitearen gauzarik onena da, oso lan eskertua dela. Ikasleek izugarri eskertzen dizute, eta hori oso pozgarria izaten da. Gainera, euren kabuz eta gogo handiz etortzen direnez, ez duzu euren gainean egon beharrik, oso ikasle finak dira. Bestetik, gauza asko gogoan hartzea kostatzen zaie, horixe da alderdi txar bakarra.

Ikastaroak ere ematen dituzue.

Bai, ikastaroak, hitzaldiak eta bestelako hainbat jardura. Horiek guztiak, baina, Bergaran antolatzen ditugu. Dena dela, Antzuolako ikasleek ere izaten dute ekintza horietan parte hartzeko aukera.

PIRINIOETARA IRTEERA

Urriaren 12a jaieguna denez, asteburua luzea dela aprobetxatuz, Pirinio aldera irteera antolatuta dute Arrola mendi elkarteak. Urriaren 12tik 14ra izango da irteera hori. Hilaren 12an, egubakoitzean, aterako dira goizeko 7:00etan. Aisatik Candanchurako ibilbidea egingo dute egun horretan. Hurrengo egunean, berriz, Candanchutik Formigalera joango dira mendirik mendi. Azkeneko egunean, urriaren 14an, Oturia mendira joatea da Arrolako proposamena. Datorren astelehenean, urriak 8, duzue izena emateko azken aukera, arratsaldeko 19:00etatik 20:00etara. Tokiz aldatu dute Arrolako egoitza; orain, Kalebarrenen dago, Anparitoren harategi parean. Nagusiek 12.500 pezeta ordaindu beharko dute. Gazteek eta ikasleek, berriz, 7.000 pezeta.

GRAFOLOGIA IKASTAROA AZARORA ATZERATU DUTE


Antzuolako Udalak antolatuta, grafologia ikastaroa egongo da Antzuolan. Aurreko Kontuolan, urriaren 20an hasiko zela iragarri genizuen. Azkenean, baina, atzeratu beharra izan dute, eta azaroaren 10ean hasiko da. Horrela, urriaren 31ra arte, eguaztena, egongo da izena emateko aukera.

DROGAK MINTZAGAI

Antzuolako Udaleko Kultura sailak antolatuta, honako hitzaldia egongo da urriaren 18an, eguena, arratsaldeko 19:00etan, udaletxean: "Zure seme-alabei drogei ez esaten laguntzeko 10 urrats". Hitzaldi hori EDEX kolektiboko kideek eskainiko dute.

ARGAZKI LEHIAKETA

Gogoratu datorren astelehena, urriaren 11, dela argazki lehiaketan lanak aurkezteko azken eguna. Bakoitzak, gehienez, hiru argazki aurkeztu ahal izango ditu, eta gaia libre da.



Zurrategi plaza 4, behea ANTZUOLA Tf. eta faxa 943 78 71 80

Sukalderako eta bainurako altzariak
Altzari rustikoetan
espezializatuak

LARREA

TABERNA

Kalebarren 17
ANTZUOLA